

Kalaallit Nunaanni pinerluttulerinermi inatsisip allanngortinneqarnera pillugu inatsisip (Killilikkamik piffissaligaasumik inissiisarfimmi inissiinermi piffissap sivilunerpaaffissaata qaffanneqarnera) Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut
(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Akissuteqaat

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Aappassaaneerinninneq

Inatsisartut aalajangiiffigisassaattut siunnersuummut matumunnga Inatsisinut Ataatsimiititaliaq peqqissaartumik suliaqarsimammat, Naalakkersuisut qutsavigiumavaat.

Pinerluttulerinermi inatsisitta piffissamut naleqquttuunissaa aamma ineriartornermut malinnaanissaa Naalakkersuisunut pingaaruteqarpoq. Tamatuma peqatigisaanik inatsisip innuttaasut kissaataannut aamma inatsisitigut naapertuilluartoqarneranik misigisimasaannut pitsaanerpaamik naapertuuttuunissaa, Naalakkersuisut kissaatigivaat. Tamanna allanngortitsinermi matumani anguniarsimavarput.

Eqqartuussiveqarfimmut tatiginninneq attatiinnarneqassappat, inuiaqatigiit pinerluttuliornernut assigiinngitsunik suussuseqartunut iliuuseriikkanut kinguneqartitsisarnerisa aamma eqqugaasut aamma inuiaqatigiit naapertuilluartoqarneranik paasinninnerisa akornanni ataqatigiittoqassaaq.

Taamaakkaluartoq allanngortitsineq una taamaallaat alloriarneruvoq siulleg. Eqqartuussiveqarnerup aaqqissuussivigeqqinneqarnissaa siunitsinniippoq, tassanilu pinerluttulerineq pillugu inatsiseqartitsinerup tiguneqarnissaa periarfissaavoq. Siunissami eqqartuussiveqarnerup politikikkut atituumik tapersersorneqarnissaa qulakkeerniarlugu, pinerluttulerinermi inatsimmi tunngaviusumik tunngaviit oqallisiginiarlugit Naalakkersuisut partiit qaaqqusimavaat, matumani pineqaatissiinernut taarsiullugit pillaatissiinerit aamma pinerluttuliornernut ataasiakkaanut pillaatissiinernut killiliussat eqqunneqarnissaannut periarfissat oqallisigineqarnissaat ilanngullugit.

Amerlanerusunik oqaaseqaateqaratik siunnersuut aappassaaneerneqarnissaanut Naalakkersuisut tunniuppaat.